

Umno, Pas wajar henti berbalah

84 - 17/8/2009
Pergaduhan dua parti Islam tidak membawa faedah

Oleh Amin Ridzuan Ishak
aminridzuan@bharian.com.my

KEPALA BATAS: Tun Abdullah Ahmad Badawi meminta Umno dan Pas supaya menghentikan perbalahan berkaitan akidah Islam yang semakin menjadi-jadi dan ketara sejak kebelakangan ini.

Bekas Perdana Menteri berkata, beliau tidak gembira melihat kedua-dua parti yang hampir 100 peratus ahlinya adalah orang Islam ber-gaduh mengenai isu akidah Islam yang tidak memberi apa-apa faedah.

Katanya, jika kedua-dua parti hendak berbalah sekali pun, biarlah mengenai isu yang memberi manfaat seperti pembangunan dan kebajikan rakyat tanpa membabitkan akidah Islam semata-mata seperti sekarang.

"Sehubungan itu, saya cadangkan supaya kedua-dua parti berbincang sekali lagi untuk mencari kesepakatan mengenai isu yang tidak boleh disentuh serta dipolitikkan.


"Mungkin mereka boleh gunakan kesempatan pilihan raya kecil Permatang Pasir ini sebagai permulaan.

"Mungkin Umno boleh menjadi peneraju dengan menemui kepimpinan Pas sekali lagi bagi mencadangkan perkara ini (perbincangan) dan minta mereka (Pas) senaraikan isu sedia dibincangkan," katanya kepada pemberita selepas mesuaras Persidangan Perwakilan Umno Bahagian Kepala Batas di sini, semalam.

Sejak kebelakangan ini,

“ Saya cadangkan kedua-dua parti berbincang sekali lagi untuk mencari kesepakatan mengenai isu yang tidak boleh disentuh serta dipolitikkan”

Abdullah Ahmad Badawi
Bekas Perdana Menteri



Umno dan Pas sering berbalas kenyataan berhubung tindakan beberapa pemimpin DAP yang dilihat mengeluarkan kenyataan mengenai Islam.

Antaranya Mursyidul Am Pas, Datuk Nik Abdul Aziz Nik Mat yang tidak membantah tindakan segelintir pemimpin DAP menghina Islam kerana parti itu bukan parti Islam serta kefahaman mereka terhadap agama rasmi Persekutuan itu mungkin tidak mendalam.

Beliau sebaliknya menyalahkan sikap pemimpin Islam yang menolak ajaran Islam sehingga agama itu tercemar dan disalahertikan kesuciannya oleh mereka yang bukan Islam.

Kenyataannya itu dibidas pemimpin Umno antaranya Timbalan Perdana Menteri, Tan Sri Muhyiddin Yassin yang menyatakan Menteri Besar Kelantan itu sanggup menghalalkan tindakan menghina Islam tanpa memikirkan sentimen orang lain hanya kerana pihak menghina adalah rakan dalam Pakatan Rakyat.

Sementara itu, Abdullah mahu tanggapan pelbagai pihak terutama parti pembangkang bahawa pihak berkuasa negara ini hanya bertindak terhadap sesebuah kaum tertentu, dihentikan.

"Ini (tanggapan) tidak begitu elok kerana mampu merosakkan perpaduan kaum dan menimbulkan keadaan tidak baik kepada rakyat. Mereka harus ada keyakinan bahawa pihak berkuasa bertindak kerana seseorang itu bersalah bukan disebabkan kaum," katanya.

DATE: 17/8/2009